

Rau Ite Imin Ru Tau Paulus Iboode Pa Yes Korin 2 Korin—2 Corinthians

¹ Yau Paulus. Maaron itaghon tauu loolo ve ighur ghau namin mbanjoona to Yesu Krisi. Yeiru tonvetaz toit Timoti, nibood rau tane ilat pa lupuun to Maaron tau aleep izi nugh Korin na. Ve yam mon mako. Rau tane ilup gham tomania Maaron tamtamon tooni patabuyaana tisov tau tileep irau taan sirivu to Akaia na paam.

² Poia to Tamaan Maaron ve Tiina toit Yesu Krisi aat iza tsiam, ve tingin gham aleep poia toman lolomim luuma. Onoon.

Maaron iuluul ghiit pa patanani toit, lesu tauul zetaanpa patanani toozi

³ Loloon poia pa Tiina toit Yesu Krisi Taama Maaron, ve tapaiti pa poia tooni. Pasaa, i loolo isasaghatin ghiit ve iuluul ghiit. I Maaron tau iravrav ateen ve ipapalot ghiit irau saawe. *

⁴ Saawe isov tau iit taleep ila patanani loolo, i iravrav ateen ve ipapalot ghiit. Leso anaan tapalot zetaanpa siriv tau tileep ila patanani loolo na, ve tarav atezi. Pasaa, uleen tau taghamghamu ila tooni, ene ipapalot ghiit. Tauta iit irau tarav zetaanpa atezi ve tapalot zi. *

⁵ Onoon, iit tau tataghon Krisi ne, tabadbaad patanani naol imin i tauu. Eemon isaav ighe

* **1:3:** Ep 1:3; 1Pe 1:3 * **1:4:** Ro 15:5; 2Kor 7:6

tabaad patanani tintiina, ene pale i tauu irav ateen, ve tagham palotiin tiina ila tooni. *

⁶ Saawe tau yei nibaad patanani, ene to iuul gham, leso ayooz ariaan pa taghoniin eez to Maaron, ve i igham mulin gham. Pa ighe Maaron ipalot ghei gha niyooz ariaan, ene pale ngar tau yei nighamu ne, ipalot gham paam ve ayooz ariaan pa badoon patanani imin yei. *

⁷ Tauvene yei nighur ila ariaan nighe: Yam pale ayooz ariaan. Pasaa, yei niwatagh: Isaav ighe itinja talup ghiit pa badoon patanani, ene pale Maaron irav ateen ve itinja tagham palotiin ila tooni. *

Paulus ipaesia patanani tau ivot pani izi taan sirivu to Asia

⁸ Yam tonjvetaz, yei nighe yam awatagh patanani tau ivot payei izi taan sirivu to Asia. Patanani tau ivot payei na, tiina kat. Irau nibaado mako. Tauvene saawe tana, nigham ngar nighe irau nileep mako, pale nimaat. *

⁹ Onoon kat. Saawe tana, nighita nighe lemai eez eta muul mako. Ye nimin neer tau tigabiiz saveen tooni ve tighe i aat imaat. Eemon patanani tawe ivot payei, leso ninumeer taumai sov, ve ninumeer Maaron. Pasaa, i mon ta irau ipaburigin yes mateegha. *

¹⁰ Tauvene patanani tiina tau ivot payei na, ene imin ta yei nileep ila naal aavo. Eemon Maaron igham mulin ghei pa patanani tawe. Tauta yei nighur ila ariaan nighe murei, isaav ighe patanani

* **1:5:** Mbo 94:19; 2Kor 4:10; Kol 1:24 * **1:6:** 2Tim 2:10 * **1:7:** Ro 8:17 * **1:8:** Mbanj 19:23+; 1Kor 15:32 * **1:9:** Yo 5:21

ivot payei muul, i pale igham mulin ghei. *

¹¹ Eemon yam aat auul ghei ve aghur ghei ila sunjuunj tsiam. I pale iloonj sunjuunj tsiam, ve iuul ghei itaghon tauu poia tooni. Leso yamŋa eval tiina lolomim poia pani, ve apakuru. *

Paulus ipaesia puughu tau itoor ŋgar tooni ve ila Korin mako

¹² Gabua tiina ee tau yei nipakur ghei pani, ene vene: Niyamaan ila lolomai nighe: Ŋgar tau nighamghamu irau nugh nugh ne, nitaghon ŋgar tau tamtamon to taan tipaiti ne mako. Poia to Maaron, tauta ipapaburigin ghei gha nibesbees pani toman lolomai eemon, ve nighamgham ŋgar tau ingalaan ila i maata. Ve ŋgar tane, yei nitotoi katini payam. *

¹³⁻¹⁴ Ve saveenj tau niboode payam na, puughu eta iyoonj mako. Saveenj tsiei isov, ŋgara igheen ghazoonja. Irau awaato mon ve aghazoonj pani. Onoon, saawe tane, yam siriv aat aghazoonj payei geeg soone. Eemon naghe le ŋgar tsiam ivot ve aghazoonj kat payei. Leso saawe to Tiina toit Yesu imuul ilam, yam tintinmim payei, imin yei tintinmim payam. *

¹⁵⁻¹⁶ Muunj, yau naghe yam tintinmim payau ve uraat tsiau. Tauta saawe tana, matag ingal naghe nalat naghit gham imin maata. Le isov, o nala taan sirivu to Masedonia. Ve saawe tau napul Masedonia, mako namuul nalat naghit gham muul, ve yam aghur ghau gha malmalig nala pa Yudea.

* **1:10:** Ro 8:35+ * **1:11:** Ro 15:30+; 2Kor 4:15; Pil 1:19 * **1:12:**

1Kor 1:17, 2:4, 13; 2Kor 2:17; 1Tes 2:10 * **1:13-14:** 2Kor 5:12; Pil 2:16; 1Tes 2:19

Leso Maaron ipalot gham pai ru itaghon laghoon ru tau naghamu na. *

¹⁷ Eemon ngar tsiau tana ighur mako. Onoon, imin maata, yau nasaav payam naghe: “Yau pale nalat.” Eemon murei, natoon aliñag naghe irau nalat mako. Ve yam aghit ghau mindai? Aghe yau nagharaat poghania ngar tsiau mako, tauta natortoor aliñag? Ma aghe nagham karom ve nambu sorokin saveen imin yes to titaghon ngar to taan, tauta saveen ru, “Vee” ve “Mako” ivotvot ila avog, ne? ¹⁸ Aloon. Maaron toit, i isasavia saveen onoon mon, ve itataghon saveen tooni. Ve yei tauvene paam. Irau nitortoor aliñamai mako. *

¹⁹ Pasaa, Maaron Naatu Yesu Krisi tau yau gha Silas ve Timoti nivotia vaaru payam na, i itortoor aliñamako. Isaav ighe i imbu saveen pa gabua eta ighe: “Vee, yau aat naghamu,” ene irau itoor aliñamul mako. Saawe isov, i itataghon saveen tooni. Ve ila uraat tooni, Maaron isaav: “Vee” pa saveen mbuaan tooni ta naol ne. *

²⁰ Pasaa, saa saveen tau Maaron imbua, ene Krisi ta igham uratoini gha anoon ivot. Tauta monmon isaav ighe tapait Maaron eeza pa tapiri ve poia tooni, iit tasavsaav taghe: “Onoon” ila Yesu Krisi eeza. *

²¹⁻²² Maaron tauu ipapalot ghei tomani gham. Tauta iit tasov taleep tunja ila to Krisi. I isiigh ghiit tamin le, ve ighur Avuvu Patabuyaana ila loloon wa. Avuvu tane imin ilaal pait ighe iit tamtamon to Maaron. Ve imin puughu pa gabua naol tau

* **1:15-16:** Mbanj 19:21; 1Kor 16:5+ * **1:18:** 1Kor 1:9; 1Tes 5:24

* **1:19:** Mbanj 18:5 * **1:20:** Ro 15:8+; Syg 3:14

pale Maaron igham pait. Tauvene iit tawatagh: Saa gabua tau Maaron imbu saveen pani na, i pale igham pait. *

²³ Saveen tau naghe nasavia ne, ene onoon. Maaron iwataghi. Puughu ta nalat mako, ene vene: Yau lolog pa nasavia saveen ariaaṇa payam, ve naghām gham lolomim isaghat sov. ²⁴ Aloon. Yei nighe nitatan gham azi, ve niṅgin ghuruun ila tsiam ne mako. Pasaa, yei niwatagh: Yam ayooz ariaaṇ pa ghuruun ila tsiam wa. Yei nighe itiaṇa talup ghiit ve tagham uraat. Leso niuul gham ve aleep toman lolomim poia. *

2

¹ Pughu tau nalat mako, ene vene: Papazoge tau nalat tsiam, naghām saveen ariaaṇa payam, ve igham lolomim isaghat. Ve ṅgar tsiau iyaryaṇ naghe gabua tauvene ivot muul sov. Tauta nalat mako. ² Pa ighe naghām lolomim isaghat, ene pale savunugha tigham ghau lolog poia? Mako. Pasaa, yam tau navaghāmunia lolomim na, yam mon ta irau agham ghau lolog poia. ³ Tauta taug nalat mako, ve nabood rau ilat to napaduduun gham. Pa naroi: Isaav ighe patanani igheen sosoon ve nalat, ene pale agham ghau lolog isaghat. Eemon yau naghe le yam agham ghau lolog poia. Ve yau naghur ila tauvene: Ighe ataghon ṅgar tau igham ghau lolog poia, ene pale yam asov lolomim poia paam. ⁴ Rau ariaaṇa tana, matag suuru izizi ve naboode. Pa naghām ṅgar naol payam, ve lolog

* **1:21-22:** Ro 8:16+; 2Kor 5:5; Ep 1:13+; Syg 7:3+ * **1:24:** 1Pe 5:3

ipataŋan kat. Yau nabood rau tana to navaghamunia lolomim mako. Naboođe payam, leso aghilaal aghe lolog igheen tsiam kat. *

Yes Korin irau tipul sosor to ƚeer tau igham sosor

⁵ ƚeer tau muuŋ igham ghau lolog ipataŋan na, i igham sosor payau mon mako. I igham yam asov lolomim ipataŋan paam. Eemon irau nayau avog pa gabua tane geeg mako. Pa aat nagham ƚeer tana loolo isaghat. *

⁶ Sosor tooni atuya tau yam eval aghuru pani to aŋgal maata na, ene irao. ⁷ Tauvene aazne, yam irau apul sosor tooni, ve arav aate ve apaloti. Mako pale loolo isaghat le isaghat kat, ve pataŋani tana itatani. *

⁸ Tauvene yau naghe napalot gham to atotoi ŋgar poia pani, leso iwatagh ighe yam lolomim igheen tooni.

⁹ Puughu tau nabood rau ariaaŋa tana payam, ene vene: Naghe natoov gham ve naghita: Pale ataghon aliŋag pa ŋgar ta naol ne, ma mako? ¹⁰ Ve yam alooŋ aliŋag ve aghur atuya pa ƚeer tana wa. Tauvene aazne, yam irau lolomim isaghatini ve apul sosor tooni. Ve isaav ighe yam apul sosor to tamtamon eta, ene yau paam, napul sosor tooni. Saa sosor tau i igham payau na, ila Krisi maata, yau napul sosor tooni. Ene poia to nagham tauvene, leso nauul gham. ¹¹ Tauvene iit irau tapul sosor tooni. Mako pale Sadan itombaani ghiit ve iliiv ghiit. Pasaa, iit takankaani pa Sadan ŋgar tooni

* **2:4:** Mbaŋ 20:31; 2Kor 7:8+
17:3

* **2:5:** 1Kor 5:1+

* **2:7:** Lu

mako. Eez maata maata tau i itovtoov ghiit pani ne, iit tawatagh zi wa. *

Uraat tauu to yes mbanjoona

¹² Saawe tau nala navot nugh Troas to navotia vaaru poia to Krisi pazi, naghita naghe Maaron ikaak ataman payau to naghama uraat izi ta sewe.

¹³ Eemon lolog ipatanan, ve naghama ngar naol. Pasaa, naghe pa naghita etag Titus izi ta sewe. Eemon mako. Tauvene yena yes Troasa nivakisi nimamai le isov, ra napul zi, ve naburig gha nala pa taan sirivu to Masedonia. Leso nail Titus izi ta sewe. *

¹⁴ Ve yau napait Maaron toman lolog poia. Pasaa, saawe isov, i imunmuun payei ve ipapalot ghei pa uraat tsiei. Ila uraat to Krisi, yei nimin yes tau tilaagh tomania daaba to zaaba tau iparav ariaan ve iliiv pa malmal tiina. *

Uraat tsiei, ene eez tau Maaron ipaghazonai tamtamon pa Krisi vaaru. Vaaru tawe, ene imin naunaun poia ee tau vaazi ila irau nugh. ¹⁵ Onoon kat. Yei uraata to Krisi nimin naunaun vaazi poia tau i igham pa Maaron imin watoonrau. Tamtamon tau nileep ila sosozi na, tisov tinunuz naunaun tane vaazi. Yes tau Maaron ighamgham uratoi zi leso igham mulin zi, ve yes tau titaghon eez to tilalez na paam. ¹⁶ Yes tau titaghon eez to tilalez na, tinunuz naunaun tane vaazi poia mako, imin mateegha

* **2:11:** Lu 22:31+ * **2:13:** 2Kor 7:5+ * **2:14:** Isaav ighe zaaba to Rom tiliiv pa malmal tiina eta, ene tigherev koiazna siriv gha yesna timuul tila pa nugh tiina Rom. Mako zaaba tawe toman daaba toozi tilaagh ila nugh loolo tomania koiazna tawe, ve eval tiina tigherev zi ve tipakur zi.

vazizi. Ve naunaun tane pale imin puughu pa timaat gha tilalez. Ve yes tau titaghon eez to lepoogh poia na, tinunuz naunaun tane vaazi imin gabua poia kat. Pasaa, itotoi zi pa eez to tigham lepoogh poia ila to Maaron. Uraat tau Maaron ighuru ila nimamai, ene patanjani. Sei irao? *

¹⁷ Tamtamon katini tilaghlaagh ve tivovotia Maaron aliinja imin lezi eez to tiyau maet to tamtamon. Eemon yei nipaak Krisi ve nileep ila tooni, ve Maaron tauu ighur ghei pa uraat. Ve yei niwatagh: Maaron ighitghita uraat tsiei. Tauta nighamgham uraat toman lolomai, ve nivovotia Maaron aliinja duduun pa tamtamon. *

3

Uraat tau Paulus ighamu, ene itotoia ighe i mbanjoona tauu to Krisi

¹ Mindai, saveen tsiei tane, yei nisavia imin paitoon taumai muul, leso aghur ila uraat tsiei? Mako. Onoon, tamtamon siriv tikis lezi rau to ipaghazonai zi ighe ezazi pa uraat toozi. Eemon yei lemai puughu eta to nitotoi rau tauvenepayam mako, ma nighason gham to abood rau tauvene payei ne mako. *

² Pasaa, yam taumim ta amin rau payei. Uraat tau nighamu ila sosomim gha anoonja ivot, tauta itotoi ighe ezamai pa uraat tau nighamghamu ne. Saveen isov to rau tana igheen ila yei lolomai, ve

* **2:16:** 1Kor 1:18; 2Kor 4:3; 1Pe 2:7+ * **2:17:** 2Kor 1:12, 4:2; 1Tes 2:5; 1Tim 6:5 * **3:1:** 2Kor 5:12, 10:12

igheen ila yam lolomim paam. Rau tana, tamtamon tisov irau tiwaato ve tigham ngar pani, leso tighur ila saveenj tsiei. *

³ Tauvene yam taumim amin rau to Kriisi tau igheen ghazonja. Rau tana, ene uraat tau nighamu ila sosomim na anoonja. Kriisi iboode pa gabua eta imin gabgab mako. Iboode pa Maaron maata yaryaare Avuvu. Ve iboode ila maet babanazi imin Maaron igham pa tutuun to Mose ne mako. I iboode ila tamtamon lolozi. *

⁴ Ila Maaron maata, yei nighur ila ariiaan nigne saveenj tane, ene onoon. Pasaa, Kriisi ileep tomani ghei pa uraat tsiei. ⁵ Eemon yei irau nipait taumai mako. Pasaa, irau nigham uraat tauvene ila tau-mai tapirimai mako. Maaron ipapalot ghei, tauta nirao. *

⁶ Tauvene Maaron tauu igham ghei nirao pa uraat tooni. Tauta nimin besoonja pa eez paaghu to i yesja tamtamon tooni tivalupu zi timin eemon. Eez tane, ene eez to taghoniin tutuun tau tiboode na mako. Ene eez to Maaron Avuvu tau itortoor ghiit tamin paaghu. Pasaa, tutuun tau tiboode na, ene igham ghiit tamaat. Ve Maaron Avuvu, i igham ghiit taleep poia ila to Maaron. *

Eez paaghu to Kriisi iliiv eez mungaana to tutuun

⁷ Eez tau muun tamtamon tibeas pa Maaron, ene igham ghiit taleep ila eez to mateegh. *

* **3:2:** 1Kor 9:2 * **3:3:** Igham 24:12; Yer 31:33; Ezek 36:27; 1Kor 3:5+; Hib 8:10 * **3:5:** Yo 15:5; 1Kor 15:10; Pil 2:13 * **3:6:** Yo 6:63; Ro 7:6; Ga 3:10+; Hib 8:6+ * **3:7:** Eez mungaana to tutuun, ene vene: Isaav ighe tataghon dudunjai tutuun tisov to Maaron, ene pale taleep poia. Ve ighe mako, ene pale aatyavyav to Maaron izaait.

Eemon saawe tau Maaron irav tutuun tawe ila maet, ve igham pa yes Israela, ene ilam toman mbonari ve tapiri tiina. Tauta yes Israela irau timarar Mose naagho malau mako. Pasaa, mbonari tawe tiina kat le ingowar matazi. Eemon mbonari tana igheen rigmon, ve isov. *

⁸ Ve eez paaghu tau aazne tabees pa Maaron, ene vene: Maaron Avuvu igham uratoi ghiit ve itoor ghiit tamin paaghu. Tauvene eez tane mbonari ve tapiri tiina kat iliiv eez munğaana. *

⁹ Eez paaghu, i le mbonari ve tapiri tiina kat iliiv eez munğaana. Onoon, eez munğaana ilam toman mbonari ve tapiri tiina. Eemon eez tawe isaav pait tauvene: Iit aat tamaat pa sosor toit. Ve eez paaghu tau aazne tataghoni, ene igham ghiit taduduun ila Maaron maata. *

¹⁰ Onoon, eez munğaana ilam toman mbonari ve tapiri tiina. Eemon isaav ighe taghazon pa eez paaghu ngara, ene aat taghita taghe eez munğaana, le mbonari ve tapiri geeg mako. Pasaa, eez paaghu mbonari, ene tiina kat iliiv eez munğaana.

¹¹ Saawe tau Maaron ivotia eez munğaana to tutuun, ene ilam toman mbonari ve tapiri. Eemon eez tawe irau igheen le alok mako. Pale isov. Ve eez paaghu tane irau isov mako. Pale igheen tauvene taghon taghon gha ila. Tauvene, i le mbonari ve tapiri tiina kat. *

¹² Yei nighur ila ariaan tauvene, tauta niroi mako, ve nasavsaav ghazon pa tamtamon. *

* **3:7:** Igham 34:1, 28; Hib 12:18 * **3:8:** Ro 7:6; Ga 3:2-5 * **3:9:** Ezek 18:4; Ro 3:21, 8:1+ * **3:11:** Ro 10:4; Hib 7:18, 8:13 * **3:12:** Mbanj 4:13; Ep 6:19; Pil 1:20

¹³ Yei nimin Mose mako. Muun, i iponpoon naagho pa uuli sirivu. Leso yes Israela timarar naagho tau isul na sov. Pasaa, mbonari tawe igheen malau mako. Igheen rig, ve isov. *

¹⁴ Eemon yes Israela ngar toozi iyaryaan, tauta tighilaal gabua tawe puughu mako. Ve aazne paam, isaav ighe tiwaat saveen to eez mungaana, tighilaal puughu mako. Ene imin uuli sirivu iponpoon matazi soone. Pasaa, Krisi mon ta irau itir uuli sirivu tawe ighau pazi. *

¹⁵ Tauta muun ve ilam aazne, isaav ighe yes Israela tiwaat saveen to Mose, yes tighilaal puughu mako. Ene imin gabua eta iponpoon lolozi ve ngar toozi. ¹⁶ Eemon isaav ighe tamtamon eta itoor ngar tooni, ve ighur ila to Tiina toit, Krisi pale igham gabua tana ighau pani.

¹⁷ Tiina tau nasavia ne, ene Maaron Avuvu. Isaav ighe i ilepleep tomani ghiit, i aat ipas ghiit ila saghati tapiri. Leso tamin besoonja sorok muul sov. *

¹⁸ Aazne, iit taghazoon pa Maaron. Gabua eta ipoon mataan muul mako. Pasaa, iit tasov taghita Neer Tiina mbonari tomania tapiri ve poia tooni ila to Krisi. I itotoi Neer Tiina naagho pait imin taghita Neer Tiina anunu ila natilonja. Tauvene mataan ilala pani, ve Tiina toit Avuvu itortoor ghiit. Leso tagham naagho, ve anaan tatotoi mbonari tomania tapiri ve poia tooni pa tamtamon. *

* **3:13:** Igham 34:33+ * **3:14:** Ro 11:7, 25; 2Kor 4:4 * **3:17:** Yo 8:32, 36; Ro 8:2, 15; Ga 4:6, 5:1 * **3:18:** Yo 1:14; Ro 8:29; 1Kor 15:49; 2Kor 4:6

4

Maaron igham ghazonja tooni isul ila loloon

¹ Maaron loolo isaghatin ghei ve ireu sosor tsiei, ve ighur uraat tane ila nimamai itaghon tauu poia tooni. Tauvene patanjani naol tau nibaad zi ne, irau itatan ghei, ve igham ghei nipul uraat tsiei tane mako. *

² Ngar mayanja naol tau tamtamon tighamgham zi imin yongaan na, yei nighur murimai pazi wa. Ngar tau yei nighamghamu ne, karom eta igheen ila loolo mako. Ve nivotorai Maaron aliinja mako. Nisavia dudunjaini. Pasaa, yei niwatagh: Maaron ighita uraat tsiei. Tauta nivovotia saveenj onoon mon pa tamtamon, ve nisavsaav ghazonj pazi. Leso tighilaal ila lolozighe yei ezamai pa uraat tane. *

³ Onoon, tamtamon siriv, ene imin gabua eta ipoon lolozighe ve ngar toozi. Tauta saawe tau nivotia vaaru poia pazi, tigham ngar pani mako. Tamtamon tauvene titaghon eez to tilalez. *

⁴ Vaaru poia isavia Krisi mbonari tomania tapiri ve poia tooni. Ve ipaghazonjaini ighe i neer tau itotoi katin Maaron naagho pait. Eemon yes tau tighur ila mako na, tighilaal ghazonja to vaaru poia mako. Pasaa, Sadan tau maaron karom to taan tane, i ipoon ngar toozi wa. *

⁵ Saawe tau nivotia mos, yei nisavsaav pa taumai mako. Nisavsaav pa tamtamon nighe: “Yesu Krisi,

* **4:1:** 1Kor 15:10; 2Kor 3:6; 1Tim 1:12+ * **4:2:** 2Kor 2:17, 5:11;
 1Tes 2:3+ * **4:3:** 1Kor 1:18, 2:14 * **4:4:** Yo 1:14, 12:31, 14:9;
 Ep 2:2; Pil 2:6; Kol 1:15; Hib 1:3

i Tiina toit. Ve yei besoonja tsiam. I tauu imbaan ghei nilam to niuul gham.” *

⁶ Muun geeg, Maaron isaav ighe: “Ghazoonja aat ivot ve isul ila ndoroom loolo!” Maaron tawe mon, tauta igham ghazoonja tooni isul ila yei lolomai paam. Leso nighilaal mbonari tomania tapiri ve poia tooni tau Kriisi itotoia pait. *

Yes mbanjoona timin uur tau tigharaat zi pa taan ve tighur kuaz popoia izila lolosi

⁷ Yei mbanjoona nimin uur tau tigharaat zi pa taan ve tighur kuaz popoia izila lolosi. Yei tamtamon sorok to taan, ve tapirimai imbool. Eemon Maaron ighur ghazoonja tooni ve tapiri izila lolomai, ve ighur uraat tooni ila nimamai. Leso itotoi tapiri ila uraat tsiei. Tapiri tawe, ene tiina le tiina kat. *

⁸ Yei, patanani naol ighamgham ghei. Eemon patanani tane itatan ghei mako. Monmon eez ivolvool payei. Eemon lolomai isaghat mako. Pasaa, yei niwatagh: Maaron pale igham eez eta ivot payei. *

⁹ Tamtamon tighurghur patanani payei. Eemon Maaron ipul ghei mako. Patanani maata maata itatan ghei nizi. Eemon niburig muul. *

¹⁰ Patanani naol tau monmon nibadbaad zi ne, ene imin nipaak Kriisi pa mateegh tooni. Eemon i ipapalot ghei ve niyooz ariiaan pa badoon patanani. Tauta nipaghazonaini nighe i ileep maata yaryaare. ¹¹ Yei tamtamon to taan mon,

* **4:5:** Mbanj 2:36; 2Kor 1:24 * **4:6:** Gnp 1:3; Mt 4:16; Yo 8:12; 1Pe 2:9 * **4:7:** 2Kor 3:5, 12:9 * **4:8:** 2Kor 1:8, 7:5 * **4:9:** Ro 8:35+

ve tapirimai imbool. Ve saawe isov tau nileep izi taan, nilepleep ila mbuzaagh maata pasaa, yei nitaghon Yesu. Eemon niyozyoos ariaan pa badoon patanani. Gabuamai tane ipaghazonai Yesu ighe i ileep maata yaryaare. ¹² Tauvene monmon nilepleep ila naal aavo. Eemon niuluul gham to agham lepoogh poia ila to Maaron.

¹³ Maaron aliina tau tiboode na isaav ighe: “Yau naghur ila to Maaron, tauta nasavia.” Yei tauvene paam nighur ila to Maaron, ve nitaghon ghuruun ila tsiei ngara. Tauta nisasavia vaaru poia pa tamtamon. ¹⁴ Pasaa, yei niwatagh: Neer tau ipaburigin Tiina toit Yesu pa mateegh na, murei pale ipaburigin ghei paam, raraate imin igham pa Yesu. Ve i pale igham ghiit tala tayooz ila naagho, ve ipavotvotin ghiit ighe: “Aghita. Ene tamtamon tsiau.” *

¹⁵ Patanani naol tau nibadbaad zi ne, ene to iuul gham. Yei nighe poia to Maaron izazaa to eval tiina, leso lolozi poia pani ve tipait eeza pa tapiri ve poia tooni. *

Paulus ighamgham ngar pa gabua tau tigheen le alok

¹⁶ Tauvene patanani naol tau nibaad zi ne, irau itatan ghei ve igham ghei nipul uraat tsiei ne mako. Onoon, anonamai ighe isaghat. Eemon ene gabua to muuri mon. Ve lolomai, saawe isov Maaron ighamgham uratoi ghei, leso itoor ghei nimin paaghu. *

* **4:14:** Ro 8:11; 1Kor 6:14; 1Tes 4:14 * **4:15:** 2Kor 1:6; Kol 1:24; 2Tim 2:10 * **4:16:** Is 40:29+; Ep 3:16; Kol 3:10

¹⁷ Patanani naol tau nibadbaad zi ne, yei nighita nighe ene gabua tiina mako. Ene raurauai mon. Ve malau mako pale isov. Eemon patanani naol tane pale iuul ghei, leso ezamai tiina izi nugh sambam, ve nileep tomania Maaron ila mbonari tiina loolo le alok. Gabua poia tau pale ivot payei ne, ene iliiv kat pa patanani tsiei ta naol ne. *

¹⁸ Tauvene gabua tau taghit zi pa mataan ne, yei matamai ila pazi mako. Matamai ilala pa gabua tau irau taghit zi mako ve taloon varuzi mon. Pasaa, gabua tau taghit zi pa mataan ne, pale tigheen rig ve tisov. Ve gabua tau aazne iit irau taghit zi mako, ene pale tigheen le alok. *

5

Paulus ipasawal ighe neez o igham anoonja paaghu to nugh sambam

¹ Yei nighita anonjama to taan tane, ene imin dur sorok to anunumai ileep ilonj ila. Ve yei niwatagh: Isaav ighe tireu dur tane, Maaron pale igham lemai ruum tauu tau igheen izi sambam. Ruum tawe, tamtamon tigharaata pa nimazi mako. Maaron tauu igharaata. Ve ruum tana pale igheen le alok. *

²⁻³ Tauvene aazne, yei nipasawal ve nitanj nighe: “Oyai, neez o nileep ila niamai paaghu tawe?” Niamai tawe, ene anonjama to sambam. Saawe tau nilonj nila, ene imin anunumai inonogh ghi pa nonoghiinja paaghu. Leso nileep tinimai nginaanja sov. *

* **4:17:** Ro 8:17+; 1Pe 1:6+

* **4:18:** Ro 8:24; 2Kor 5:7; Hib 11:1

* **5:1:** 2Kor 4:7

* **5:2-3:** Ro 8:23

⁴ Saawe tau nilepleep ilonj ila dur tsiei to taan tane, lolomai ipatanjan ve nitanjan pa lepoogh to nugh sambam. Eemon lolomai pa nipul anonjamaï to taan tane mako. Nighe anonjamaï to taan ighengheen tauvene, le malmalimai nilonj nila anonjamaï paaghu to sambam tau pale igheen le alok. Leso anonjamaï to sambam iyol anonjamaï to taan tane, imin tanonogh ghiit pa nonoghiinja paaghu. * *

⁵ Maaron ighur ghiit to tagham lepoogh tauvene. Ve igham tauu Avuvu pait imin puughu pa gabua naol tau murei pale igham pait. *

⁶ Tauta saawe isov, yei niroi mako, ve niyooz ari-aan. Onoon saawe tau nileep tomania anonjamaï to taan, nileep soghan pa Tiina toit. Eemon yei niwatagh: Murei pale nila nileep tomania. *

⁷ Tauvene aazne, taghit katin gabua eta pa mataan soone. Lepoogh toit to taan, ene tataghon eez to ghuruunj ila. *

⁸ Nayol alinjag muul. Yei niroi mako ve niyooz ari-aan. Ve lolomai nighe le nipul anonjamaï to taan tane, ve nila nileep tomania Tiina toit Yesu izi sambam. Pasaa, ene gabua poia kat iliiv lepoogh tsiei to taan. *

⁹ Tauta isaav ighe nileep soghan pa Tiina toit, ma nileep tomania izi nugh tooni, ene yei nizuari ghei

* **5:4:** Saveenji ziiri tane ngara tauvene: Paulus loolo pa imaata, ve anunu mon ila nugh sambam mako. I ighe Krisi rekia imuul ilam. Leso imaata sov. Igham anoonja paaghu ve malmali ila nugh sambam. * **5:4:** Ro 8:11; 1Kor 15:53+ * **5:5:** 2Kor 1:22; Ep 1:13+ * **5:6:** Hib 11:13+ * **5:7:** 1Kor 13:12; 2Kor 4:18; Hib 11:1 * **5:8:** Pil 1:23

pa ghamuun ngar tau i loolo pani. *

¹⁰ Pa murei, iit tasov aat tayooz ila Krisi naagho. Leso igabiiz ghiit, ve ighur atuya pa iit enaenja itaghon ngar tau taghamu izi taan na. Ngar popoia, ve ngar sasaghati paam. *

Iit leen uraat to tauul tamtamon, leso yesja Maaron tivalupu zi timin eemon

¹¹ Tauvene yei niroi pa Neer Tiina. Tauta nizuari ghei nighe le nigham tamtamon titoor ngar toozi ila pani. Lolomai tomania ngar tsiei, ene igheen ghazonja ila Maaron maata. Ve nighe yam paam aghazon payei, ve aghilaal ila lolomim aghe yei nibesbees pa Maaron toman lolomai. *

¹² Yam agham ngar pa saveen tsiei tane mindai? Aghe nipait taumai muul, leso aghur ila aghe yei ezamai pa uraat tsiei? Mako. Yei nisavia saveen tane, leso apakur ghei pa uraat tau nighamu ne, ve irau ayol saveen to zeran siriv tau tileep tomani gham na. Zeran tana, tighamgham ngar pa tamtamon ezazi ve tipakur zi pa gabua to uliin mon. Ve gabua to loloon, yes tigham ngar pani mako. *

¹³ Tamtamon siriv tighit ghei tighe ngar tsiei ivaghamgham imin boraunja. Ve siriv tighe ngar tsiei iduduun. Ene poia. Tauzi gha tisavsaav! Eemon uraat tsiei tane, nighamghamu to nipakur Maaron eeza, ve niuul gham. *

¹⁴ Ngar to Krisi tau loolo igheen toit kat na, ene ighamgham pooz payei ve ipapaburigin ghei pa

* **5:9:** Kol 1:10; 1Tes 4:1 * **5:10:** Mt 25:31+; Mbanj 17:31; Ro 2:16; Syg 20:12 * **5:11:** Mbo 139:1+; Hib 10:31; Jud 23 * **5:12:** 2Kor 1:14+ * **5:13:** 1Kor 1:18-25

ghamuun uraat tooni. Pasaa, yei nighur ila nigne
 ñeer eemon tawe ta igham tamtamon tisov niazi,
 ve imaat pa sosor toozi. Tauta yes tau tipaako
 pa mateegh tooni na, tisov tipul lepoogh toozi
 mun̄gaana wa. *

¹⁵ Kriisi imaat pa tamtamon tisov, leso yes tau
 tigham lepoogh paaghu ila tooni na, tileep
 titaghon tauzi ngar toozi muul sov, ve tileep
 titaghon ngar tau i loolo pani. Pasaa, i imaat
 pa sosor toozi, ve iburig pa mateegh, leso iuul zi. *

¹⁶ Tauvene aazne, yei nigabiiz tamtamon eta
 itaghon ngar to taan muul mako. Onoon, muun̄ yei
 nigabiiz Kriisi itaghon taan ngara. Eemon aazne,
 nigham ngar tauvene pani muul mako. ¹⁷ Isaav
 ighe tamtamon eta imin Kriisi le, ve ileep ila tooni,
 ene Maaron igham gabua paaghu ivot. Ngar
 mun̄gaana to tamtamon tana, ene isov, ve i igham
 lepoogh paaghu. *

¹⁸ Gabua isov tana ivot ila to Maaron. Aghita.
 Muun̄, koi isap itinja Maaron sosoon. Eemon ila
 uraat to Kriisi, aazne itinja Maaron tavalupu ghiit
 tamin eemon wa. Ve i ighur uraat ila nimamai
 ighe niuul tamtamon, leso yesja Maaron tivalupu
 zi timin eemon. *

¹⁹ Muun̄, koi isap iit tamtamon ve Maaron sosoon.
 Pasaa, tamamalaan̄ pa tutuun̄ tooni. Eemon ila
 uraat to Kriisi, Maaron ireu sosor toit, ve ipasov
 koi tawe. Tauta aazne, maata kisin sosor toit muul
 mako, ve itinja tavalupu ghiit tamin eemon wa.

* **5:14:** Ro 5:15, 6:11+; 1Tim 2:6 * **5:15:** Ro 14:7+; Ga 2:20; 1Pe
 4:2 * **5:17:** Yo 3:3-7; Ro 6:4; Ga 6:15; Syg 21:4+ * **5:18:** Ro
 5:10; Kol 1:20; 1Yo 2:2

Ve i ighur saveen tooni ilam tsiei, lesu nivotia pa tamtamon, ve tiwatagh eez to yesna Maaron tivalupu zi timin eemon. *

²⁰ Tauvene yei nigham Krisi naagho, ve Maaron ivovotia aliina payam ila avomai. Ye nitan rarai gham pa Krisi eeza nighe: “Atoor ngar tsiam ila pa Maaron. Lesu yamna avalupu gham amin eemon.” ²¹ Aghita. Krisi, i le sosor eta mako. Eemon Maaron ighur sosor toit izaa tooni ve imaat imin watoonrau to ireua. Lesu iit tau tapaak Krisi ne, tamin tamtamon dudunazi ila Maaron maata. *

6

¹ Yen Maaron niluplup ghei pa uraat tooni. Tauvene nighe nipalot gham tauvene: Poia to Maaron tau izaa tsiam na, aat ipaburigin gham pa taghoniin Maaron ngar tooni. Lesu poia tooni tana ighur anoon. Ighe mako, ene pale imin kaut sorok. *

² Maaron aliina isaav tauvene:

“Yau taug naghur saawe to naghham mulin gham ve naghham poghani gham. Ve saawe tana duduun, naloon sunuun tsiam, ve nauul gham.” *

Aloon. Saawe to Maaron igham mulin ghiit ve igham poghani ghiit, tauta aazne tazaa pani wa. *

Lepoogh to besoon tauu to Krisi

* **5:19:** Mbo 32:1+; Ro 3:23+; Kol 1:19+ * **5:21:** Is 53:6+; Ro

5:19; Ga 3:13; Pil 3:9; 1Yo 3:5 * **6:1:** 2Kor 1:24, 5:20; Hib 12:15

* **6:2:** Is 49:8 * **6:2:** Lu 4:18+; Hib 3:13

³ Besoonj tsiei tau nighamghamu pa Krisi ne, yei nighe nitaghon ngar tau iduduunj kat ila tamtamon matazi. Pa ighe nigham sosor eta, ve tamtamon tirere ghei, ene pale sosor tsiei tana ipoon zi ve tighur ila to Krisi mako. *

⁴ Ngar tsiei isov, ene itotoi ighe yei besoonja tauu to Maaron. Pasaa, patanjani maata maata ighamgham ghei, eemon niyooz ariaan pa badoonj zi. Monmon patanjani izazaa tsiei, ve saawe siriv, nighita nighe lemai eez muul mako. *

⁵ Tamtamon tiloslos ghei, ve tighurghur ghei nilonj nila ruum to yavyavuunj, ve nighamgham saghat ila malmal. Yei nirav taumai pa uraat to Krisi le tapirimai isov kat. Ve saawe naol, nighengheen poi mako, ve pitooltool ghei. * *

⁶ Yei nigham ngar tau ingalaan mon ila Maaron maata, ve nighazonj pa ngar tooni, ve nighamgham poghania tamtamon. Ve isaav ighe tigham saghatin ghei, ene niyai ghei ve nibaado mon. Avuvu Patabuyaanj ilepleep tomani ghei, ve nighur lolomai pa tamtamon kat. *

⁷ Yei nisavsavvia saveen onoon mon, ve Maaron tapiri ipapalot ghei. Gabua tsiei to malmal, ene ngar tau iduduunj ila Maaron maata. Ngar tane imin iiz tau nipaparav pani, ve imin sigheu tau niponpoon taumai pani. *

* **6:3:** Ro 14:13; 1Kor 8:13, 10:32 * **6:4:** 2Kor 4:9+ * **6:5:** Eez ite to tatoor ziiri tane, ene vene: “Saawe naol, yei nighengheen poi mako. Nimamaat ve ninjun taumai pa ghaniin aniin, leso matamai ingal sunjunj.” * **6:5:** Mbanj 16:23; 2Kor 11:23+ * **6:6:** Ro 12:9; 2Kor 4:2; Ga 5:22; Kol 3:12; 1Tim 4:12 * **6:7:** 1Kor 2:4; 2Kor 10:4

⁸ Saawe tau nigham uraat to Maaron, tamtamon siriv tipait ezamai, ve siriv tivelegh ghei tighe yei tamtamon sorok. Tamtamon siriv tipait varumai, ve siriv tivaghamunia ezamai. Tamtamon siriv tighit ghei tighe yei besoonja tauu to Maaron, ve siriv tighe yei nigham karom ve nipaghau tamtamon pa eez to Maaron. ⁹ Tamtamon siriv tighazoon payei, ve siriv tikankaan payei. Saawe siriv, nigham ngar nighe paita nimaat. Eemon nimaat mako. Patanjani siriv tau tivot payei, ene to ipaduduun ghei. Eemon irav ghei nimaat mako. *

¹⁰ Onoon, patanjani naol tau nibadbaad zi, ene igham ghei lolomai ipatanjan. Eemon Maaron igham ghei lolomai poia irau saawe. Yei nileep imin mbolaanja. Eemon niuluul eval tiina le tirau kat pa ghamuun gabua popoia ila to Maaron. Yei lemai gabua eta mako. Eemon nirao pa gabua naol isov. *

Paulus ivotia loolo pa yes Korin

¹¹⁻¹² O yam Korin, yei lolomai igheen tsiam kat, tauta nisavia saveen naol tane payam. Leso awatagh katin lolomai. Eemon nighita nighe yam aponpoon lolomim payei soone. ¹³ Yau nasaav payam imin natugnja yam: Apoon lolomim payei muul sov. Aghur lolomim payei, imin yei nighur lolomai payam. *

Taghur muriin pa ngar sasaghati

¹⁴ Aloonj. Yes tau tighur ila to Krisi mako na, yam apaak zi sov. Pa ngar toozi imin yam mako.

* **6:9:** Mbo 118:18; 2Kor 4:9+

* **6:10:** 2Kor 7:4, 8:9; Pil 2:17

* **6:13:** 1Kor 4:14

Yes tau titaghon ngar duduunja ve yes tau timalaan pa Maaron tutuun tooni na, pale tilup zi pa uraat mindai? Ghazonja ve ndoroom irau tilup zi? Mako. *

15 Ma Krisi yesuru Sadan †

tigham ngar raraate? Isaav ighe tamtamon ee ighur ila to Krisi, ve ite ighur ila mako, saa gabua irau ilup yesuru? Mako. *

16 Yam awatagh: Iit tamin Maaron maata yaryaare rumei tooni. Mindai, irau rumei tooni ipaak maaron karomja rumei toozi? Mako. Saveenja, Maaron isavia pataghaan wa. Ighe:

“Yau pale naleep tomani zi, ve nalaghlaagh ila sosozi.

Ve yau pale namin Maaron toozi, ve yes timin tamtamon tsiau.” *

17 Tauta Maaron isaav muul ighe:

“Apul zeran sasaghati tana tileep, ve ala aleep soghan pazi.

Ve gabua tau ighe ingalaan mako, na agharauu sov.

Leso naghham gham toman lolog poia. *

18 Ve yau namin tamamim,

ve yam amin natugja ve natug livanja.

Saveen tane, ene Maaron saksaki tauu aliinja.”

*

7

1 Yam zeran tsiei, lolomai igheen tsiam kat.

* **6:14:** 1Kor 5:9+; Ep 5:6, 11; 1Yo 1:5+ † **6:15:** Paulus ibood Belial (o Beliar). Belial, ene Sadan eeza ite. * **6:15:** 1Kor 10:20+

* **6:16:** Wkp 26:12; Ezek 37:27; 1Kor 3:16; Syg 21:3 * **6:17:** Wkp 5:2; Is 52:11; Syg 18:4 * **6:18:** Ro 8:14; Syg 21:7

Aghita. Maaron igham leen saveen mbuaan popoia naol tane. Tauvene ngar isov tau ivaghamunia anonjaan ma anunuun, ve igham ghiit tasaghat ila Maaron maata na, tapuliir zi tileplez. Ve taroi pa Maaron, ve taghur tauun tamin i le kat, ve tataghon ngar patabuyaany mon imin i tauu. *

Paulus loolo poia kat pasaa, yes Korin titoor ngar toozi wa

² Yam tonvetaz, apoon lolomim payei muul sov. Akaak lolomim payei lak! Pa yei nigham sosor pa tamtamon eta, ma nivaghamunia tamtamon eta, ma nigham karom to nium gabua to tamtamon eta, ene mako. *

³ Saveen tsiau tane, yau nasavia to nasees matamim mako. Naghe napaduduun gham mon. Yau nasaav payam wa. Lolomai igheen tsiam kat. Tauvene isaav ighe talepleep, ma tamaat, ene gabua eta irau irav motin lupuun toit mako. ⁴ Yau nasaav ghazonja payam. Lolog ruru payam mako. Yau naghith gham naghe yam arao kat. Tauta agham ghau tintinig. Onoon, patanjani naol ighamgham ghei. Eemon ngar tau yam aghamghamu na, ene ipalot ghau, ve igham ghau lolog poia le poia kat.

⁵ Saawe tau nila nivot taan sirivu to Masedonia, yei lemai sooso eta to mariaon mako. Pasaa, patanjani maata maata injarui ghei. Yenja tamtamon nivavazorai ghei. Ve nigham ngar naol ila lolomai ve roinj tiina igham ghei. *

* **7:1:** 1Tes 4:7; Hib 10:22; 1Pe 1:15; 1Yo 3:3 * **7:2:** Mbanj 20:33;
2Kor 6:12, 12:17 * **7:5:** Mbanj 20:1

⁶ Eemon Maaron to it, i Neer to palotiin yes tau patanani itatan zi na. Tauta igham Titus ilam peria tsiei izi Masedonia, leso ipalot ghei, ve irav atemai.
*

⁷ Ve tane mon mako. Gabua ite tau ipalot ghei, ene vene: Saawe tau Titus ilam, i ipaesia varumim payei ighe saawe tau ilat peria tsiam, yam apaloti ve arav aate. Ve ipaes payei ighe lolomim ipatanan kat pa patanani tau muun ivot ila sosoon, ve apasawal aghe le aghit ghau muul, ve ngar tsiam iyaryaan kat aghe apaak ghau pa ngar tsiau. Saveen tooni tawe igham ghau lolog poia le poia kat.

⁸ Yau nawatagh: Rau tau naboode payam na, aat igham gham lolomim isaghat. Eemon lolog ipatanan pa gabua tawe mako. Onoon, muun lolog ipatanan pani. Ve aazne mako. Pasaa, naghita naghe lolomim ipatanan rigmon, ve isov. *

⁹ Tauta aazne lolog poia. Eemon lolog poia pa lolomim tau isaghat na mako. Yau lolog poia pasaa, saawe tau lolomim isaghat, yam atoor ngar tsiam. Ngar to loloon ipatanan pa sosor toit ve tatoor ngar toit, ene itaghon Maaron ngar tooni. Tauta rau tsiei tana ivaghamun gham mako.

¹⁰ Isaav ighe loloon ipatanan itaghon Maaron ngar tooni, ene igham ghiit tatoor loloon, leso Maaron igham mulin ghiit. Ngar tauvene, sei irau loolo ipatanan pani? Mako. Eemon isaav ighe loloon ipatanan imin yes tau titaghon ngar to taan, ene aat igherev ghiit pa mateegh. *

¹¹ Aghita. Saawe tau agham rau tsiau ve lolomim

* **7:6:** 2Kor 1:3, 2:13 * **7:8:** 2Kor 2:4 * **7:10:** Mbo 38:18; Lu 18:13+

isaghat itaghon Maaron ngar tooni, yam irau asanjan mako. Rekia ve agharaat taumim. Pasaa, ngar tsiam iyaryaan aghe apaghazonai taumim, leso yau nawatagh: Patanani tau ivot na, yam aleep ila loolo mako. Yam aroi pa Maaron, ve aghe ataghon dudunai ngar tooni. Tauta aghur atuya pa neer tau igham sosor na. Ve aazne, apasawal aghe le aghit ghau muul. Ngar tsiam isov tana itotoi ighe patanani tau ivot na, yam sosor tsiam mako.

¹² Saawe tau nabood rau tana payam, yau nagham ngar tiina pa neer tau igham sosor tana, ma tamtamon tau i igham sosor pani na mako. * Yau naghe yam apaghazonai taumim ila Maaron maata aghe yam lolomim igheen tsiei ve apaak ghei pa ngar tsiei. Tauta nabood rau tana.

¹³ Tauvene ngar tau yam aghamu na, ene ipalot ghei, ve irav atemai. Ve gabua ite. Titus ipaes payei ighe i loolo poia kat pasaa, saawe tau i ilat, yam asov aghamu toman lolomim poia. Tauta aate izi, ve igham ngar naol muul mako. Ngar tsiam tana ipalot ghei paam, ve igham lolomai poia kat. ¹⁴ Muun, yau nasavia varumim pa Titus ve napait gham pa ngar tsiam. Saveen tsiau tawe igham ghau mayag mako. Pasaa, alinamai tau nisavia pani imin paitoon gham na, ene onoon. I tauu ighita wa. Tauvene saveen tsiei tawe onoon, raraate imin saveen isov tau yei nisasavia payam na paam, ene onoon mon. ¹⁵ Titus paam loolo igheen tsiam kat. Pasaa, maata ingalngal saawe tau i ilat tsiam. Yam atandagh pani ve aghamu

* **7:12:** Mos ziiri tane, Paulus isavia neer ee tau muun izoor aliija ve igham sosor. Eemon i loolo pa watoon neer tawe eeza ivot ighazon mako.

toman lolomim poia, ve yam asov aloonj aliinja. Pasaa, aroi pa Maaron ve aghe ataghon ngar tooni.
*

¹⁶ Tauvene aazne, yau lolog poia le poia kat. Pasaa, yau naghur ila ariaan naghe yam aat ataghon katin Maaron ngar tooni.

8

Paulus ipalot yes Korin ighe tiuul tamtamon to Krisi tau tileep izi Yudea ve mbolaan igham zi

¹ Yam tonvetaz, yei nighe yam awatagh: Poia to Maaron ipaburigin lupuun to Krisi tau tileep izi taan sirivu to Masedonia le tigham ngar poia kat.
*

² Onoon, yes tileep ila patanani tiina loolo, ve mbolaan igham zi le tileep saghat kat. Eemon tigoog maet tiina kat to tiuul tamtamon to Krisi tau tileep saghat izi Yerusalem. Ngar toozi tawe, tighamu toman lolozi poia kat. Pasaa, yes matazi reinj gabua. *

³ Taug naghita ngar toozi wa. Tauvene naghe napaes payam: Maet tau tigooga pa uleen na, tiina kat. Tighur irau to yes tighuru, ve tighur siriv paam izala paavo. Tauzi lolozi tighe tigham tauvene. ⁴ Pasaa, ngar toozi iyaryaan kat tighe yes paam tighur nimazi pa uleen Maaron tamtamon tooni tau mbolaan igham zi na. Tauta tinoknok ghasoniin ghei le niyok pazi. *

⁵ Yei nighe pa tigham ngar tane mon. Eemon mako. Imin maata, yes tighur tauzi toman lolozi isov ila

* **7:15:** 2Kor 2:9 * **8:1:** Ro 15:26+ * **8:2:** Mk 12:44; Ro 12:8

* **8:4:** Mbanj 11:29; 2Kor 9:1+

pa Tiina toit, ve tighur tauzi payei paam, itaghon Maaron loolo.

⁶ Uraat to uleen tane, poia to Maaron imin puughu pani, ve Titus ipaburiginini ila sosomim wa. Tauta yei nisaav pani to ipalot gham pani le apasovu kat. ⁷ Maaron Avuvu irei tapiri tomania uraat ve ngar maata maata payam le arau kat. Yam aghur ila ariiaan, avovotia Maaron aliija pa tamtamon, aghazoon pa ngar tooni, ve tinimim ibees pa uraat tooni. Ve uraat tau nighamu ila sosomim na, ene ipaburigin gham, tauta lolomim pa Maaron ve tamtamon paam. Uraat to uleen tamtamon, ene ngar ite tau poia to Maaron ipaburigin ghiit pani. Tauvene yam arao paam, ve matamim reirei, o poia. *

⁸ Alijag tane, nasavia imin tutuun payam mako. Yau naghe natoov gham, lesa naghita: Yam aghur lolomim pa Maaron ve tamtamon kat, imin yes siriv tau tinizi ibees pa uraat tane, ma mako?

⁹ Poia to Tiina toit Yesu Krisi, yam awataghi wa. Muun, i irao pa gabua ta naol ne. Eemon ipuliir gabua tooni tawe tisov tizi tigheen, ve izilam taan gha ileep imin neer mbolaanja, lesa iuul gham, ve igham gham arau kat pa gabua to Maaron. *

¹⁰ Tauvene yau naghita naghe: Yam apasov uraat tane le isov kat, o poia. Ndaman tau ila wa, lolomim ipazaagh gham pa uraat to uleen tane, ve apaburiginini imin maata. ¹¹ Uraat to uleen tau lolomim ipaburigin gham pani na, yam irau tinimim ibees pani, ve agham uratoini le apasovu kat. Yam aat aghur irau to aghuru. Isaav ighe

* **8:7:** 1Kor 1:5, 16:1+ * **8:9:** Mt 8:20; Pil 2:6+

lemim maet tiina, aghur tiina. Ighe lemim tiina mako, aghur ngiira. ¹² Pa ighe iit leen gabua eta, ve loloon taghe tagham pa Maaron, i pale loolo poia pani. Ve ighe leen gabua mako, ene poia. Maaron irau ighur maata pait to tagham gabua tauvene pani ne mako. *

¹³ Ngar tsiam ikau pa saveen tsiau tane sov. Yau naghe yam auul tamtamon siriv tileep poia, ve taumim aleep saghat ne mako. Naghe yam asov aleep raraate. ¹⁴ Aazne, yam arao pa gabua naol. Tauvene yam irau auul zi pa mbolaan toozi. Ve murei, isaav ighe yes tirao pa gabua siriv tau yam ambool pani, ene pale anazi tiuul gham. Leso yam asov aleep raraate. *

¹⁵ Yam irau ataghon ngar tau muun ivot pa yes Israela, indeen saawe tau tiyau aniin manna na. Saveen tiboode pataghaan tauvene:

“Yes tau tiyau tiina na, tighan le tipasovu kat. Avozi muuri rigta izi mako. Ve yes tau tiyau ngiira mon na, tauvene paam. Timbool mako. Tighan le apozi isun.” *

Paulus imbaan zeran tol to tiuul yes Korin

¹⁶ Yau napait Maaron toman lolog poia. Pasaa, i igham Titus ighur loolo payam kat. Tauta i ighe iuul gham, raraate imin yei nighe niuul gham.

¹⁷ Saawe tau yei nighasoni to ilat ighit gham, i iyok pa alinamai. Ve tauu loolo ighe ilat ighit gham paam. Pasaa, i ighur loolo payam kat ve ighe iuul gham. ¹⁸ Ve yei aat nimbaan tonjetaz toit ite leso yesuru Titus tilat. Neer tane, lupun to Maaron

* **8:12:** Mk 12:43; 2Kor 9:7; 1Pe 4:10

* **8:14:** 2Kor 9:12+

* **8:15:** Igham 16:18

tisov tipapait eeza pa uraat tooni to votiaan vaaru poia. ¹⁹ Ve tane mon mako. Lupuun to Krisi tighuru, leso yenja nilaagh pa uraat tane. Uraat to uleen tane, poia to Maaron ipaburigini ila sosoon. Ve yei nighe nighamu to nipait Tiina toit eeza, ve nipaghazonai taumai nighe yei tinimai ibees pa uraat to uleen Maaron tamtamon tooni.

²⁰⁻²¹ Ye i niwatagh: Tamtamon pale tighur maet tiina pa uleen tonjetaz toit tau mbolaan igham zi na. Tauvene yei nighe ningin poghania maet tau nigham zi ne, ve nigham ngar tau iduduun mon ila Tiina toit maata, ve tamtamon matazi paam. Leso tamtamon tiyau avozi payei sov. *

²² Ve yei aat nimbaan tonjetaz toit ite paam ilat tomania zeran ru tawe, leso yes tol tilat payam. Neer tane, yei nighur uraat maata maata ila niima, ve nighita nighe tiini ibesbees pa uraat to Maaron. I ighur ilat tsiam ariaan ighe yam aghur lolomim pa uraat tane kat, tauta ighe iuul gham.

²³ Tauvene Titus, yam awataghi wa. Pasaa, yeiru niluplup ghei pa uraat tau nighamghamu ila sosomim. Ve tonjetaz toit ru tau nasavi zi payam na, yesuru tigham lupuun to Krisi naagho ve tilat. Uraat toozi tomania ngar tau tighamghamu na, ene ipait Krisi eeza, ve ipaghazonai tapiri tomania poia tooni. ²⁴ Tauvene isaav ighe yes tol tilat peria tsiam, na agham zi ve atotoi ngar poia pazi. Leso tiwatagh tighe yam lolomim pazi, ve lupuun tisov to Krisi tiwatagh tighe: Saveen tau muun nisavia to nipait varumim na, ene onoon.

* **8:20-21:** Ro 12:17+; 2Kor 6:3; 1Pe 2:12

9

Paulus ipalot tamtamon to Akaia, leso yes paam tigoog maet pa yes Yerusalema

¹⁻² Aiyo, yam tau aleep izi taan sirivu to Akaia na, irau nabood saveen malaua payam mako. Pasaa, yau nawatagh: Ngar tsiam iyaryaan aghe auul Maaron tamtamon tooni tau mbolaan igham zi na. Ene imin besoon tsiam ila pa Maaron. Monmon, yau napapait varumim pa zetaanja to Masedonia. Pasaa, ndaman tau ila wa, yam agoog maet ve aghuru gha isanan. Ngar tsiam iyaryaan kat aghe agham uraat to uleen tane, tauta ipaburigin eval tiina to Masedonia paam. ³ Tauvene yei nipait varumim ve nisaav pazi nighe yam agoog maet wa. Puughu tane ta yau naghe nambaan Titus tomania tonvetaz toit ru tawe timuun tilat, leso tiuul gham pa uraat tane. Mako pale saveen tau nisavia imin paitoon gham na imin kaut sorok. ⁴ Yau naghur ila ariaan naghe yam pale agharaat gabua imin abumim ve isanan. Eemon isaav ighe yena tamtamon siriv to Masedonia nilat, ve tighit gham agharaat gabua soone, ene pale mayag pa alinag tau nasavia to napait gham na, ve yam paam pale mayamim. ⁵ Matag ingal tane, tauta naghe nambaan tonvetaz toit tol tana timuun tilat. Leso yamja agharaat maet tau agooga itaghon saveen mbuaan tsiam na, ve isanan pataghaan. Maet tana pale itotoi poia to Maaron pa tamtamon tooni. Yau lolog pa nalat nazozonook payam ve aghur gabua ne mako. Yau naghe agham gabua tiina toman lolomim.

⁶ Matamim ingal: Isaav ighe tamtamon eta ivazogh aniinŋ ŋgiira, ene pale saawe to taitainŋ, i aat ighita anoonŋa ŋgiira mon. Ve tamtamon tau ighe ivazogh aniinŋ katini, ene pale ighita anoonŋa katini. *

⁷ Tauvene maet piiz tau tamtamon enjaenŋa tighuru itaghon tauzi lolozi, ene poia. Eemon isaav ighe yam anguruut gabua tsiam, ve tizozonook payam ila ila le aghuru, ene poia mako. Pasaa, Maaron lolo pa yes tau tireirei gabua toozi toman lolozi poia. ⁸ Maaron, i irau ighur poia tooni tiina izaa tsiam ila eez maata maata. Leso yam arau kat pa gabua naol isov irau saawe, ve irau agham uraat popoia ta naol ne. *

⁹ Saveenŋa tiboode pataghaanŋ wa. Ighe:

“Neer poia, i ireirei gabua tooni pa yes mbolaanŋa.

Tamtamon tauvene, ŋgar tooni duduunŋa pale igheen ariaanŋ taghon taghon gha ila.” *

¹⁰ Yes tau tivavazogh aniinŋ na, Maaron igham lezi aniinŋ uuve. Ve i igham aniinŋ pa iit tasov. I pale igham gabua tsiam ivot katini, lesa arei tiina ila pa yes mbolaanŋa. Ŋgar tauvene iduduunŋ ila i maata, ve ighur anoonŋa popoia maata maata. ¹¹ Tauvene Maaron pale igham gham arau kat pa gabua naol isov. Leso yam irau agham uleenŋ pa tamtamon irau saawe. Ve saawe tau yei nigham gabua tsiam ila peria to yes tau mbolaanŋ igham zi na, yes pale lolozi poia pa Maaron, ve tipakuru pa uleenŋ tau yam agham pazi na.

¹² Uraat tane, yam aghamu imin besoonŋ tsiam

* **9:6:** Lu 6:38; Ga 6:7+ * **9:8:** Lp 28:27; Pil 4:19 * **9:9:** Mbo 112:9

ila pa Maaron. Uleen̄ tsiam pale ipasov mbolaan̄ to tamtamon tooni. Ve tane mon mako. Pale igham eval tiina lolozi poia pa Maaron, ve tipaiti kat pa poia tooni paam. *

¹³ Ngar tsiam tau aghe arei gabua tsiam ve ayam-baar uleen̄ ila pa yes mbolaan̄ na, ene itotoi gham ighe yam aghur ila vaaru poia to Krisi, ve ataghon aliin̄a. Tauvene tamtamon tau tigham uleen̄ ilat tsiam na, pale tipait Maaron eeza pa tapiri ve poia tooni. ¹⁴ Ve lolozi igheen tsiam, ve matazi ingal gham ila sun̄uun̄ toozi. Pasaa, tighita poia tiina to Maaron igheen tsiam.

¹⁵ Iit loloon poia pa Maaron ve tapakuru! Pasaa, i igham leen gabua tau poia le poia kat. Isaav ighe tasavia gabua tawe, ene pale tasavia mindai? Pa saveen̄ eta irao mako. *

10

Paulus iyol saveen̄ ngaliin̄ to tamtamon siriv

¹ Tamtamon siriv tingal̄ngal saveen̄ payau tighe saawe tau naleep tomani gham, yau naroiroi ve nasasavia saveen̄ popoia mon payam. Ve ighe naleep soghan payam, ene napakur taug ve avog iyaryaan̄ payam. Tauvene yau Paulus naghe napalot gham pa saveen̄ siriv. Saveen̄ tau naghe nasavia, ene nasavia toman ngar marowa ve ngar to natatan taug imin Krisi itaghoni. *

² Yau nawatagh: Zeran siriv tighe yei nitaghon Maaron ngar tooni mako. Tighe nitaghon ngar to tamtamon mon. Zeran tawe aat tiyamaan̄ zi. Pa

* **9:12:** 2Kor 4:15, 8:14 * **9:15:** Yo 3:16; 1Pe 1:8-9 * **10:1:** Mt 11:29; 1Kor 2:3; Pil 2:5+

ighe nilat, ene irau naroi pazi mako. Pale nayaon zi toman saveen ariaaŋa. Eemon lolog pa nagham ngar tauvene mako. Tauvene natan rarai gham naghe agharaat ngar tsiam. *

³ Onoon, aazne yei nileep izi taan. Eemon nipa-parav imin yes tau titaghon taan ngara ne mako.

⁴ Pasaa, zaab to malmal tau yei nipaparav pani, ene to taan mako. Ene zaab tau Maaron igham payei, ve i tauu tapiri igheen ila. Tauta ruum arianazi tau koiamaŋa tiyonjoon ila lolozi na, yei irau nireu mbirisai zi tizi. *

⁵ Zeran siriv tipapait tauzi pa ngar toozi, ve avozi iyaryaŋ pa ngar karom naol tau iponpoon eez pa yes tau tighe tiwatagh Maaron na. Zeran tauvene, yei nireureu ngar ve saveen karom toozi isov. Ve nitatan ngar toozi sasaghati, ve nigham ngar toozi isov imuul ila pa Kriŋi. Leso titaghon ngar tooni, ve tileep ila i saamba. *

⁶ Yeŋ nighur matamai ilat tsiam mon. Ighe yam aloon aliŋamai ve ataghon saveen tsiei, ene yeŋ aat nighur atuya pa tamtamon tisov tau tizoroor saveen na.

⁷ Aloon. Yam agabiiz gabua paavo mon sov. Agabiiz poghania loolo tooni paam. Isaav ighe tamtamon eta igham ngar ighe i to Kriŋi, i aat iwatagh ighe yeŋ paam to Kriŋi, ve Kriŋi tauu ta ighur ghei pa uraat tooni. *

⁸ Onoon, saveen tsiau tane, ene imin napait eza-mai pa uraat tau nighamghamu ne. Eemon mayag mako. Pasaa, yeŋ ezamai pa uraat tane. Tiina

* **10:2:** 1Kor 4:21 * **10:4:** 2Kor 6:7; Ep 6:13+; 1Tim 1:18

* **10:5:** 1Kor 1:19 * **10:7:** Yo 7:24; 2Kor 11:23; 1Yo 4:6

toit ighur ghei pa uraat tane to nivaghamun gham mako. I ighe nipalot gham. *

⁹ Tauvene agham ngar aghe rau tau nabood zi payam na, ene to naparoi gham sov.

¹⁰ Tamtamon siriv tisavi ghau tighe: “Saveen tau i iboode ila rau na, ariaaŋa ve toman tapiri. Eemon isaav ighe tauu ilam peria, ene taghita taghe i le tapiri mako, ve ivaghamgham pa savsaveen. Saveen tooni anoonŋa mako.” ¹¹ Zeran tana irau tigham ngar poi. Pa saveen tau nileep malau ve niboode payam na, isaav ighe nilat gha itinŋa taleep, ene pale nitaghon saveen tana ngara. *

Paulus ighe i le eeza pa ghamuun uraat izi Korin

¹² Yei nimin zeran siriv mako. Yes tiliiv ghei kat. Pasaa, ngar tau tighamghamu na, yei irau nighamu mako. Yei mayamai pa paitoonŋa taumai ezamai. Eemon yes mayazi pa ghamuun ngar tauvene mako. Tighe yes tirao kat. Pasaa, saawe tau tigabiiz tauzi, yes tigham ngar pa Maaron aliinŋa mako. Tigabiiz tauzi tomania to zetazŋa ngar toozi. Zeran tauvene, lezi ngar mako. *

¹³ Yei irau nipakur ghei sorok imin zeran tana mako. Isaav ighe nipakur ghei, ene nipakur ghei pa uraat tau nighamu izi nugh tau Maaron ighuru payei na. Nugh tana, yam Korin aleep ila paam. Ve nugh tau ighe lemai ezamai to nigham uraat pani mako, ene irau nimalaanŋa ve nila nigham ta sewe mako. *

* **10:8:** 2Kor 13:10 * **10:11:** 2Kor 13:2 * **10:12:** Lu 18:9-14

* **10:13:** Ro 12:3, 15:18

¹⁴ Nugh tau Maaron ighuru payei to nigham uratoini na, yei nimalaan pani mako. Yam Korin aleep ilonj ila paam. Ve yei ta nilat ve nivotia vaaru poia to Krisi payam imin maata. Tauvene yei ezamai pa ghamuunj uraat ila yam sosomim. *

¹⁵ Yei irau nipakur ghei pa tamtamon siriv uraat toozi mako. Uraat tau taumai nighamu izi nugh tau Maaron ighuru payei to nigham uratoini, o nipakur ghei pani. Uraat tau nighamghamu ila sosomim to nipalot ghuruunj ila tsiam, yei nighe ivot imin tiina. ¹⁶ Leso imin eez payei to nivotia vaaru poia izi nugh siriv tau tighengheen soone. Yam Korin ve taghon gha ila. Pa lolomai pa nipakur ghei pa uraat tau tamtamon ite ighamu ne mako. Tauvene nighe le nila nugh tau tamtamon tigham uratoi zi soone, o poia. *

¹⁷ Maaron aliinja isaav ighe:

“Tamtamon tau loolo pa ngar to pakuruun, na i aat ipakur Njeer Tiina.” *

¹⁸ Isaav ighe tamtamon eta ipait tauu, ene takankaan: Maaron loolo poia pani, ma mako? Ve ighe Maaron tauu ipait tamtamon eta, ene tawatagh taghe i loolo poia pani. *

11

Paulus iveveen yes Korin pa mbanjoonja karomnja

¹ Yau naghe naghham ngar to boraunja rig. Mindai, irau ayok payau? ² Aghita. Yau nasiigh gham pa Krisi wa. Ve ngar tsiau iyaryaan naghe le

* **10:14:** 1Kor 3:5 * **10:16:** Ro 15:20 * **10:17:** Yer 9:23+;
1Kor 1:31 * **10:18:** Ro 2:29; 1Kor 4:4+

ngar tsiam isov ingalaan mon, ve naghur gham ala tooni, imin livaa mbiu tau tighuru ila to tamoot. Pasaa, Maaron ngar tooni iyaryaan ighe tamtamon tooni tighur lolozi ve ngar toozi isov ila pani mon. *

³ Aazne, yam ataghon ngar ngalaan ve aghur lolomim isov inarui Krisi. Eemon naroi pa aat tamtamon siriv tikau ngar tsiam, imin muun moot igham karom pa Eva ve itombaana, mako apul ngar tana. *

⁴ Pasaa, yau nawatagh: Tamtamon siriv tilat tileep tomani gham, ve saveen tau tivovotia pa Yesu na, ene raraate imin saveen tau muun yei nisavia payam na mako. Ve avuvu tau yes tigde yam aghamu, ene raraate imin Maaron Avuvu tau muun aghamu na mako. Ve vaaru poia tau tivovotia payam na paam, ene raraate imin vaaru poia tau yei nisavia payam ve aghur ila na mako. Eemon yam agham zi toman lolomim poia, ve apul zi gha tighamgham uraat toozi tawe, ve aghur ila saveen toozi. *

⁵ Aloon. Mbanjoon siriv tau yam aghit zi aghe ezazi tintiina na, yes tiliiv ghau mako. Saa ngar tau yes tighamu, yau naghamu paam. *

⁶ Onoon, yau neer to savsaveen imin yes mako. Eemon ngar to Maaron, yau nambool pani mako. Saawe naol, ngar maata maata tau naghamghamu ne, ipaghazonai ghau ila matamim ighe yau naghazon pa Maaron ngar tooni. *

* **11:2:** Ep 5:27; Kol 1:28; Syg 14:4 * **11:3:** Gnp 3:1+; 2Pe 3:17 * **11:4:** Ga 1:6+ * **11:5:** 1Kor 15:10; 2Kor 12:11; Ga 2:6+ * **11:6:** 1Kor 1:17, 2:1, 13; Ep 3:4

⁷ Yam awatagh: Saawe tau navotia vaaru poia to Maaron payam, natatan taug, ve naghham uraat payam sorok. Nayok pa agham leg atuya mako. Yau nataghon eez tauvene to napakur gham. Laak, yam aghita mindai? Yau nasosor? *

⁸ Saawe tana, yau naleep ila lupuuñ siriv to Krisi nimazi. Uleen tau tigham payau na, ene iuluul ghau to naghham uratoi gham. Ngar tane, ene imin yau naum gabua toozi, ve naghham payam.

⁹ Saawe tau itinja talepleep ve mbolaan igham ghau, yau naghason gham pa uleen eta mako. Pasaa, tonvetaz siriv to Masedonia tilam, ve tiuul ghau pa saa gabua tau nambool pani na. Ve lolog pa naghham patanani eta payam mako. Tauta nayai ghau, ve naghason gham pa uleen eta mako. Ve aazne ve taghon gha ila paam, pale nataghon ngar raraate mon. *

¹⁰ Aloon. Saveen onoon to Krisi igheen ila lolog ve i tauu ighit ghau ve nasavia saveen tane. Yam tamtamon to Akaia, tsiam eta irau igham ghau napul eez tau nataghoni pa uraat tsiau ne mako. Pa eez tane ta igham ghau tintinig ve napakur ghau pani. ¹¹ Mindai, yam aghe yau lolog payam mako, tauta nataghon eez tane? Maaron iwatagh: Yau lolog igheen tsiam kat. ¹² Tauvene irau nayok payam to auul ghau ne mako. Eez tau nataghoni pa uraat tsiau ne, ene pale ighengheen tauvene. Pa naghe napoon eez pa yes tau tipapait tauzi ezazi tighe yes raratezi imin yei.

Ngar tau mbanjoonja karomnja tighamghamu

* **11:7:** 1Kor 9:12+ * **11:9:** 2Kor 12:13; Pil 4:15+; 1Tes 2:9

¹³ Zeran tawe, tigham tauzi timin mbanjoona to Krisi. Eemon yes mbanjoona tauu to Krisi mako! Tigham karom. *

¹⁴ Ve iit irau tarur pa karom toozi tawe mako. Pasaa, Sadan tauu irau itoor ghi imin ajela ve itotoi ghazoonja to Maaron, leso itombaan ghiit. *

¹⁵ Tauvene besoonja tooni paam, irau tigham tauzi timin zeran tau titaghon ngar duduunja. Eemon tarur pazi sov. Murei, Maaron pale ighur atuya injarui zi pa ngar toozi.

Patajani naol tau Paulus ibaad zi, tauta ipagha-zonjaini ighe i mbanjoona tauu to Krisi

¹⁶ Yau nasaav wa. Naghe nasavia saveen rig imin borauna. Eemon tsiam eta ighit ghau imin borau sov. Ve isaav ighe aghit ghau imin borau, ene poia! Apul ghau ve naghram ngar imin yes borauna, ve napait taug ezag rig. ¹⁷ Yau nawatagh: Saveen tau naghe nasavia to napait taug, ene itaghon ngar to Tiina toit mako. Saveen tau naghe nasavia, ene imin saveen to yes borauna tau lezi ngar mako. ¹⁸ Ve tambaanjo. Pasaa, eval tiina tau yamja alepleep na, tipapait tauzi ezazi itaghon ngar to taan. Tauvene yau paam, anag naghe napait taug. ¹⁹ Aa yam Korin, yam aat ngar puughu! Tauta yes tau lezi ngar mako na, yam lolomim poia pazi, ve lolomim pa lonjaan saveen to yes borauna! ²⁰ Ve tane mon mako. Pa ighe tamtamon eta itatan gham ve izoornugh ighe ataghoni pa ngar tooni mon, ma ipasovuur gabua tsiam, ma igham gabua tsiam piind ee mon, ma ipapait tauu, ma iposai

* **11:13:** Mt 7:15+; Mbanj 20:29+; 2Kor 2:17 * **11:14:** Ga 1:8

gham ve ipamayanin gham, na yam ayok pani mon, ve apuli ighamgham tauvene. ²¹ Zeran tana tiliiv ghei kat! Tigham ghei mayamai. Pasaa, ngar tau tighamghamu na, yei irau nitaghoni mako.

Aiyo, naghe naseen saveen tsiau borau tane. Pasaa, zeran siriv tau tileep tomani gham na mayazi mako ve tipapait tauzi ezazi. Tauvene yau aat nataghon ngar toozi ve napait taug ezag paam!
*

²² Mindai, zeran tana yes Hibrua? Yau paam to Hibru. Ve yes to Israel? Yau paam to Israel. Ve yes tivot ila to Abaram? Yau paam navot ila to Abaram. * *

²³ Ve yes besoonja to Kisi? Yau paam, besoonja tooni. Eemon yau naliiv zi. Alinag tane, yau nawatagh, ene saveen to boraunja. Eemon tam-baanjo! Yau narav taug pa uraat to Kisi le naliiv zi. Saawe naol tilos ghau le nasaghat, ve tighur ghau naloj nala ruum to yavyavuun pai katini. Ve saawe naol, naghe paita namaat. Patanani naol tau nabaad zi ne, ene naliiv zeran tana. *

²⁴ Daaba to yes Yuda tilos ghau pa ravraav pai liim wa. Ve saawe enjaenja tau tilos ghau na, tilos

* **11:21:** 2Kor 10:10 * **11:22:** Saveen 'Hibrua' ve 'Israela', pughuzi ite ite. Hibrua, ene Abaram paaghu tooni. Ve saveen 'Israela' ene injarui ghuruun ila toozi. Yes tau Maaron igham zi timin ile, ve titaghon tutuun tooni na tiwaat tauzi tighe yes Israela. Ve nugh nugh tiwaat zi tighe 'Yuda'. * **11:22:** Mban 22:3; Ro 11:1; Pil 3:4+ * **11:23:** 1Kor 4:9+; 2Kor 4:11, 6:4+

ghau pai tamoot ee sanjavul liim ve paan (39). † *

²⁵ Yes Roma tigham toon ve tilos ghau pai tol wa. Ve saawe ee, eval tikor maet ve tirav matin ghau. Pai tol, yau nazaa waan ve niraav nila le waan imbiriis ila te paavo. Ve saawe ee, namoghan ila te paavo pa mbon ee, ve mataaz ee. *

²⁶ Saawe naol tau nalaghlaagh, saghatiin maata maata inajarui ghau ve rigmon kanan namaat. Yaa ivot toman tapiri le rigmon kanan izugh ghau gha nalaleg. Monmon umbuuna, ve yes Yuda tau yena nugh eemon, ve yes tau Yuda mako na paam tizuari zi tighe le tivaghamun ghau. Tauvene isaav ighe naleep ila nugh tintiina, ma nalaghlaagh izi nugh nginaana, ma nazaa waan ve naraav ila te paavo, ene patanani ighamgham ghau tauvene. Ve yes tau titoom ve tigham tauzi timin tonvetaz to Krisi na, tighamgham patanani tiina payau paam. *

²⁷ Monmon, yau narav taug pa uraat ve nagheen poi mako. Ve saawe naol naleep saghat, ve murun ghau ve pitool ghau. Leg aniin mako. Ve ngoaan ighamgham ghau pasaa, leg nonoghiina poia eta to nanonogh ghau pani mako. *

²⁸ Patanani naol tawe, to tinig mon. Ve gabua ite ighamgham patanani payau paam. Pasaa, saawe isov, yau naghamgham ngar naol pa lupuun tisov

† **11:24:** Tutuun to Mose isaav tauvene: Isaav ighe tilos tamta-mon eta, yes irau tilosi pa tamoot ru (40) ve izi. Irau timalaan pa 40 ve izala mako. Tauvene saawe tau yes Yuda tilos Paulus, tingal maata kat. * **11:24:** Lo 25:3 * **11:25:** Mban 14:19, 16:22, 27:41 * **11:26:** Mban 9:23, 13:50, 20:3, 23:12+ * **11:27:** Mban 20:31; 2Kor 6:5

to Krisi, ve lolog bubu pazi. ²⁹ Isaav ighe tam-tamon eta ghuruun ila tooni iyaryaan mako, ene igham ghau nayamaan naghe tapirig isov. Ve ighe tigherev toit eta gha igham sosor, ene igham ghau ateg yavyav kat.

³⁰ Isaav ighe ngar tsiam iyaryaan aghe napait taug, ene poia. Yau aat nataghon ngar tsiam. Eemon saawe tau napakur ghau, yau aat nasavia gabua siriv tau titotoi tighe yau tapirig imbool. *

³¹ Maaron tau Tiina toit Yesu Krisi Taama na, iit aat tapait eeza irau saawe. Iiwatagh: Saveen tsiau tane, karom mako. Ene onoon mon. *

³² Saawe tau naleep izi nugh tiina Damaskus, gavana tau kinik Aretas ighuru pa nginiin nugh tawe na, ighur zaaba siriv to tingin ataman to nugh, leso tikis ghau. ³³ Eemon naleep ila nakaral tiina loolo, ve zetagna titugh ghau itaghon sooso to yaghur tau ighen ila didiin tiina to nugh, ve nazila. Tauta i ikis ghau mako, ve naghau. *

12

Paulus isavia tandaghiin tooni

¹ Onoon, yau naghita naghe ngar to paitoon tauun ezaan, ene iuul ghiit mako. Eemon leg eez ite paam mako pasaa, yam lolomim pa ngar tauvene. Tauta yau aat naseen saveen tsiau, ve nasavia gabua siriv tau Tiina toit Yesu ivotia payau ila tandaghiin. ² Yau nawatagh neer ee to

* **11:30:** 2Kor 12:5, 9+ * **11:31:** Ro 1:9+; 2Kor 1:23 * **11:33:** Mban 9:23+

Krisi. Ndaman sanjavul ve paan tau ila wa, Maaron indae izala pa sambam tau saanja le saanja kat. *

Ve yau nawatagh mako. Neer tawe tauu izala ve ighita pa maata, ma itandagh mon? Maaron mon ta iwatagh. ³⁻⁴ Tauvene neer tana, Maaron indae izala pa nugh tooni tau paghuuna le paghuuna kat. Ve nayol alinag muul. Nawatagh mako. Neer tana tauu izala ve ighita pa maata, ma itandagh mon? Maaron mon ta iwatagh. Saawe tau ileep ta sewe, i iloon saveen to gabua siriv. Gabua tawe, isaav ighe tatoova to tasavia, ene pale tarao mako. Pasaa, saveen eta irau ivotia gabua tawe ighazon mako. Ve gabua ite. Gabua tawe lezi ngalsekiin. Tamtamon eta to taan irau ivoti zi mako. ⁵ Neer tau gabua tawe ivot pani na, yau irau napakuru. Eemon irau napakur taug ne mako. Yau naghe nasavia gabua siriv tau itotoi ighe yau tapirig imbool. Tane mon ta napakur ghau pani. *

⁶ Tauvene yau irau napakur taug mako. Eemon isaav ighe naghham tauvene, ene aat naghham ngar to borauna mako. Pasaa, saveen tau nasavia to napait taug, ene onoon. Eemon lolog pa ngar tauvene mako. Pasaa, lolog pa tamtamon tipait ezag sorok mako. Naghe tighita ngar tau naghhamghamu ne, ve tiloon saveen tsiau. Ve isaav ighe tighita gabuag

* **12:2:** Saveen ziiri tane, Paulus isavia tauu. I loolo pa igham pakuruun tiina mako. Tauta iwaat tauu eeza mako, ve ighuru izaa to neer ite. Saveen tau Paulus iboode na, isaav tauvene: “izala pa sambam tau imin tol pani.” Yes Israela ngar toozi tauvene: Sambam tol ighengheen. Ee, ene sooso tau man tirovroov ila. Ite imin ru, ene sooso tau aaz, kaiyo ve pitum tigheen ila. Ve imin tol tau igheen saanja le saanja kat, ene nugh sambam tau Maaron ileep pani. * **12:5:** 2Kor 11:30

ve tipait ghau, ene poia.

Saawe tau tapiriin imbool, Krisi ipapalot ghiit, leso tayooz ariaan

⁷ Maaron ivotia gabua popoia katini payau. Eemon i loolo pa napakur taug pa ngar tau i igham payau ne mako. Tauta ipul Sadan ivav- aghamun ghau pa patanani ee to ulig. Patanani tau ighamgham ghau ne, ene imin mbanjoona to Sadan. Ingalngal ghau imin waar tuatau, leso napakur taug geeg sov. *

⁸ Patanani tane, yau naghason Tiina toit pai tol naghe ighamu ighau payau. ⁹ Eemon i isaav payau ighe: “Mako. Poia tsiau tau izazaa tsio, ene irao. Uil saa kaut muul? Yes tau tapirizi imbool, ene yau irau natotoi tapirig ivot ighazoon kat ila toozi.” Tauvene isaav ighe tapirig imbool, ene tintinig, ve napakur ghau. Pasaa, saawe tau taug tapirig imbool, ene Krisi tapiri tiina igheen tsiau. *

¹⁰ Tauvene isaav ighe nataghon Krisi, ve naya- maan taug naghe tapirig imbool, ve tamtamon tipamayanin ghau, ve tigham saghatin ghau, ve tighur patanani payau, ene lolog poia mon. Pasaa, saawe tau tapirig imbool, Krisi ipapalot ghau pa tauu tapiri. Tauta nayooz ariaan. *

Paulus igham ngar naol pa yes Korin

¹¹ Oyai, yam Korin agham ghau nasavia saveen imin yes borauna wa. Imin ta yam apait ghau pa uraat tsiau, kanan poia. Eemon yam agham tauvene mako. Onoon, yau neer sorok. Eemon yes

* **12:7:** Ga 4:13+ * **12:9:** 2Kor 11:30; Pil 4:11+ * **12:10:** Ro 5:3; 2Kor 13:4

mbaroonja tau yam aghit zi aghe ezazi tintiina na, yeŋa raratemaŋi. Saa ngar tau yes tighamu, ene yau naghamu paam. *

¹² Ngar ve uraat tau naghamsghamu ila sosomim, ene itotoi ighe yau mbaroonja tauu to Krisi. Pasaa, nayooz ariaan pa badoon patanani, ve Maaron ipalot ghau gha naghams gabua ngeretazi ve uraat tintiina ivotvot. Tauta itotoi ighe i ileep tomani ghau pa uraat tsiau. *

¹³ Laak, yau naghams saa sosor payam? Ngar eemon geeg tau naghams payam na, ene ite rig pa ngar tau naghamsghams pa lupuun siriv to Krisi. Ene nayok pa aghams leg atuya mako. Naghams tauvene pasaa, lolog pa naghams patanani payam mako. Ighe yam aghita aghe ngar tsiau tana iduduun mako, na apul sosor tsiau! *

¹⁴ Yau nagig gham pai ru wa. Ve aazne, matag ingal naghe nalat naghits gham muul imin pai tol. Ve irau naghams patanani eta payam mako. Pasaa, lolog pa naghams gabua tsiam mako. Yau naghams ngar pa yam taumim. Naghe lolomim ilam tsiau, o poi. Aghita. Geegeu tindoundou gabua pa uleen tamazŋa ma tinazŋa? Mako. Yes geegeu tileep ila tamazŋa ma tinazŋa nimazi. *

¹⁵ Tauvene isaav ighe yau narei taug tomania gabua tsiau isov to nauul gham, ene lolog poia mon. Ma mindai? Ngar tsiau tau lolog igheen tsiam kat, tauta ighams gham lolomim payau geeg mako ne? *

* **12:11:** 2Kor 11:5 * **12:12:** Mk 16:17+; Ro 15:19 * **12:13:** 2Kor 11:9 * **12:14:** 2Kor 13:1 * **12:15:** Pil 2:17; 1Tes 2:8

¹⁶ Tauvene yau lolog pa naghām patanani payam mako, tauta nayok pa aghām leg atuya mako. Aiyo, saveen tane imuul ta sene. Tala geeg sov.

Yau nawatagh: Zeran siriv tau tileep tomani gham na, tingalngal saveen payau tighe: “Neer tawe, i irao pa ghamuun karom. Onoon, i iyok pait to tagham le atuya mako. Eemon ilam itombaan ghiit, ve iyauur maet tau tagooga pa uleen na ve ighamu imin le!” ¹⁷ Saveen toozi tawe, yau nakankaan pani. Yes tau nambaan zi tilat payam na, toozi eta imin eez payau to natombaan gham ve nayau gabua tsiam? Mako. ¹⁸ Onoon, yau ta napalot Titus pa saveen gha ilat. Ve nambaan tonvetaz toit ite ilat tomania. Ve mindai? Titus itombaan gham, ve iyau gabua tsiam? Yam awatagh: I irau ighām ngar tauvene mako. Ve yeiru Titus ngar tsiei ve gabuamai raraate. *

Ngar siriv to yes Korin tau Paulus loolo pa ghi-toon zi mako

¹⁹ Mindai, yam aghe saveen tau niboode ila rau tane, ene to nipoon taumai? Mako. Yei nisavia saveen tane ila Maaron maata itaghon Kriisi ngar tooni. Pasaa, yei nipaak Kriisi ve nileep ila tooni. Yam tonvetaz, lolomai igheen tsiam kat. Tauvene ngar isov tau nighamghamu ne, ene to iuul gham ve ipalot gham. ²⁰ Eemon yau naroi: Saawe tau ighe nalat, ene pale naghita ngar tsiam le irau lolog mako. Ighe tauvene, ene pale yau nayaon gham ve naghām ngar tau irau lolomim mako na. Pasaa, matag ingal naghe saawe tau nalat, ene pale naghit

* **12:18:** 2Kor 8:6, 8:16+

gham aghamgham ngar sasaghati naol tauvene: Aparzoor gha akuup taumim ala soghan soghan, ve ngar tsiam iyaryaan aghe atatan zeetmimna, ve agham zi titaghon ngar tsiam mon. Ve atemim yavyav, agham ngar pa taumim mon, angalnhal saveen pa zeetmimna, asisinai zi, apapait taumim ezamim, ve aghamgham ngar sasaghati siriv paam tau ireureu lupuun tsiam. *

²¹ Ve naroi pa gabua ite paam: Isaav ighe namuul nalat, ve naghit gham agharaat taumim soone, ene pale Maaron ipamayanin ghau ila matamim. Mako lolog ipatanan, ve natan pa eval tiina tau tigham sosor, ve titoor ngar toozi soone na. Ene nasavia yes tau ngar toozi ingalaan mako, ve matazi ghaara imin ngavuun, ve tila pa naghozi mon ve tigham ngar sasaghati maata maata. *

13

Tagabiiz poghania tauun pa ghuruun ila toit

¹ Yau nalat naghit gham pai ru wa. Ve aazne naghe naghham laghoon tsiau ite muul imin tol. Leso nawatagh katin ngar tsiam. Pasaa, Maaron aliina isaav tauvene:

“Tamtamon ru ma tol aat tighita gabua pa tauzi matazi ve tipariaan saveena, o taghur ila taghe ene onoon.” *

² Saawe tau nalat naleep tomani gham imin pai ru, yau nasaav ariaan payam naghe ayamaan gham pa ngar tau aghamghamu na. Ve aazne, naleep malau, ve nayol alinag muul. Isaav ighe namuul

* **12:20:** 1Kor 4:21; 2Kor 10:2 * **12:21:** 2Kor 13:2 * **13:1:** Lo 17:6

nalat, ve naghita yes tau muun tigham sosor na titoor ngar toozi soone, ene irau naghurghur zi mako. Pale naghur patanani pazi. Ve yes mon mako. Tamtamon siriv tau aazne tighamgham sosor na paam, irau naghurghur zi mako. ³ Aazne, ngar tsiam iyaryaan aghe le aghita gabua eta imin ilaal payam. Leso awatagh aghe yau navotia Krisi aliina payam. Tauvene yam pale aghita. Eemon Krisi tapiri igheen soghan payam mako. I ighamgham uraat ila sosomim toman tapiri tiina. Ve yam aghilaalo mako. ⁴ Onoon, saawe tau Krisi imaat izala ai pambaroon, tamtamon tighita tighe i le tapiri mako. Eemon Maaron tapiri ipaburigin pa mateegh, ve aazne i ileep maata yaryaare. Yei tauvene paam. Tapirimai imbool. Eemon nipaak Krisi ve nileep ila tooni, tauta Maaron tapiri ipapalot ghei pa uraat tsiei, lesu niuul gham. *

⁵ Agabiiz poghania taumim: Ngar tau aghamghamu na, itotoi ighe yam aghur ila, ma mako? Ve yam irau aghilaal aghe Krisi ileep ila lolomim, ma mako? Anumeer taumim sorok sov. Pa aat aghur ila mako ma vene. ⁶ Ve yei nighur ila tauvene: Isaav ighe agabiiz ghei, ene pale aghilaal aghe yei mbanoonja tauu to Krisi. ⁷ Yei nighason Maaron to ipalot gham, lesu agham ngar saghati muul sov. Pa nighe le ataghon katin ngar isov tau iduduun ila i maata. Ve isaav ighe tamtamon tigabiiz ghei tighe yei mbanoonja tauu to Krisi, ma tighe yei nigham karom pa uraat tsiei, ene kaut sorok. Eemon yam aat ataghon katin ngar duduunja, o agham ghei lolomai poia. ⁸ Pasaa,

* 13:4: 2Kor 12:9; Pil 2:7+

yei irau nizoor saveen onoon mako. Yei nileep to nipariaaŋa. ⁹ Tauvene isaav ighe tamtamon tighit ghei tighe tapirimai imbool, ene poia. Eemon nighe yam ayooz ariaan pa ghuruun ila tsiam, o lolomai poia. Tauta saawe isov, nighurghur gham ila sunuun tsiei, ve nighaghason Maaron to igham uratoi gham le ngar tsiam isov iduduun mon ila i maata.

¹⁰ Saveen tane, aazne naleep soghan ve na-boode ilat payam. Pasaa, lolog pa nalat ve naghham saveen ariaaŋa payam mako. Onoon, Tiina toit ighur ghau to naghham uraat tauvene payam. Eemon yau irau to navaghamunia tamtamon mako. I ighur ghau to napalot tamtamon, leso ghuruun ila toozi ivot imin tiina ve iyaryaŋa.
*

¹¹ Yam tonvetaz, naghe napasov saveen tsiau. Yam asov aloon saveen palotiin tsiau tane, ve lolomim poia, agharaat ngar tsiam, alup lolomim imin eemon, ve ataghon ngar luuma mon. Leso Maaron tau loolo igheen toit ve igham ghiit taleep poia toman loloon luuma na, ileep tomani gham.
*

¹² Tauvene lolomim poia pa taumim ve avataki nimamim *
itaghon ngar to iit tamtamon to Maaron. *

¹³ Maaron tamtamon tooni tau tileep ta sene, tigham aaz poia toozi ilat payam.

* **13:10:** 1Kor 4:21; 2Kor 2:3, 10:2, 8 * **13:11:** Ro 15:33; Pil

2:12, 3:1; 1Tes 5:16 * **13:12:** Paulus ibood ighe: 'Avaghani avomim.' Ene eez toozi tau itotoi ighe lolozi pa tauzi. Ve iit tagham tauvene mako. Tayanin pa tamtamon, mako itinja tavataki nimaan.

* **13:12:** Ro 16:16

¹⁴ Poia to Tiina to it Yesu Kriisi iza to yam asov,
ve ŋgar to Tamaan Maaron tau loolo igheen to it
kat na igheen tomani gham, ve Avuvu Patabuya
ilup gham amin eemon. Onoon.

Maaron Saveen Tooni Patabuyaana
The New Testament and portions of the Old Testament
in the Tuam dialect of the Saveeng language of Papua
New Guinea. The Saveeng language is also called the
Mutu language.
Sampela hap Buk Baibel long tokples Saveeng Tuam
long Niugini.

copyright © 2011 Wycliffe Bible Translators, Inc.

Language: Saveeng (Mutu)

Dialect: Tuam

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-31

PDF generated using Haiola and XeLaTeX on 11 Nov 2022 from source files dated 9 Oct 2020

adb844f0-d769-5b05-9dd0-7c01fca938bb